

आकाशवाणी

खबरां विकास

1. परीक्षा पे चर्चा दे 8 संस्करण च प्रधानमंत्री मोदी होरें विद्यार्थिं कन्नै गल्लबात कीती। उनें विद्यार्थिं गी सेहतमंद रौहने आस्तै पोषण खुराक लैने दी सलाह दिती।
2. प्रधानमंत्री नरेंद्र मोदी होर अज्ज फ्रांस ते अमरीका दे दौरे पर, पेरिस च फ्रांस दे राष्ट्रपति हुंदे कन्नै ए.आई एक्शन समिट 2025 दी सह-अध्यक्षता करडन।
3. राज्यसभा च आम बजट 2025-26 पर चर्चा शुरू जिस्सलै के लोकसभा च बहस परतियै अज्ज रम्भ होई।
4. सरकार नै पी.एम इंटर्नशिप योजना एम.एस.एम.ई च विस्तार नेई कीते जाने दी पुष्टि कीती।
5. भारत दी सरिता नै पैरा तीरंदाजी एशिया कप च सुन्ने दा तगमा जित्तेआ। आदिल मोहम्मद नै कैहू दा तगमा अपने नाऽ कीता।

<><><><><><>

Pariksha Pe Charcha

प्रधानमंत्री नरेन्द्र मोदी होरें दिल्ली दी सुंदर नर्सरी च अपने लोकप्रिय कार्यक्रम “परीक्षा पे चर्चा” दे 8में संस्करण च देश भरै थमां विद्यार्थिं कन्नै गल्लबात कीती। गल्लबात दरान प्रधानमंत्री होरें विद्यार्थिं गी मतेयानें च मते कोला मते नंबर लैने आले दबाहू कोला बचने दी सलाहू दिती। उनें आखेआ जे विद्यार्थिं गी बिजन कुसै डर-त्राहू दी तैआरी करने ते लगातार अपने आपै गी चुनौती देना लोड़चदा। उनें विद्यार्थिं गी आखेआ जे अपने ध्यान गी केन्द्रित करना बड़ा मता जरूरी ऐ तां जे ओहू मतेयानें दे तनाहू गी सेहत पर हावी नेई होने देन। एह्दे लेई उनें बच्चें गी योगा करने दी सलाहू दिती। इस मौके पर प्रधानमंत्री होरें विद्यार्थिं गी अपने खान-पान उप्पर बी ध्यान देने लेई आखेआ। उनें इस गल्लै गी उजागर कीता जे सेहत दा मतलब छड़ा बमारी नेई होना गै नेई ऐ सगुआं एहू पोशक खाना पीना, हरी सब्जियां, अपनी निंदर पूरी करना, बडलै आली धुप्प रोकना ते योगा करना इनें सब्बने आदतें कन्नै सेहत बेहू होंदी ऐ ते तनाहू घट्ट होंदा ऐ। प्रधानमंत्री होरें विद्यार्थिं दे माता-पिता गी सलाहू दिती जे ओहू अपने बच्चें गी अपने हुनर दे साब्बै विशय चुनन देन ते उंदे पर अपनी जोर-जबरदस्ती नेई थोपन। प्रधानमंत्री होरें गल्लबात दरान विद्यार्थिं गी आखेआ जे ओहू अपने बर्ताव कन्नै गै समाज पर सम्मान हासल करी सकदे न। इस कार्यक्रम गी आकाशवाणी, दूरदर्शन, स्वयं स्वयं प्रभाव प्रधानमंत्री हुंदे दफ्तर दे यूट्यूब ते शिक्षा मंत्रालय दे सोशल मीडिया चैनलें पर बी प्रसारित कीता गेआ।

<><><><><><><>

Reasi

प्रधानमंत्री नरेंद्र मोदी हुंदे परीक्षा पे चर्चा कार्यक्रम गी रियासी दे डी.सी दफ्तर च सफलतापूर्वक दस्सेआ गेआ। इस कार्यक्रम च विद्यार्थिएं, अध्यापकें ते अभिभावकें हिस्सा लैता। इस दौरान मतेयानें सरबन्धी तनाव गी घट्ट करने ते शैक्षणिक प्रतिभा गी होर बेहतर करने बारै चर्चा गी सब्बनें सुनेआ। परीक्षा पे चर्चा कार्यक्रम विद्यार्थिएं गी मौके उपलब्ध करोआंदा ऐ, प्रधानमंत्री नरेंद्र मोदी हुंदे कन्नै मलाटी करने दा ते प्रेरणादायक चर्चा सुनने दा। एहू कार्यक्रम जिला प्रशासन आसेआ शिक्षा मैहकमे दे सहयोग कन्नै आयोजित कीता गेआ।

<><><><><><>

PM-France-US Visit

प्रधानमंत्री नरेंद्र मोदी होरें फ्रांस ते अमरीका दे इक महत्वै आहले कूटनीतिक दौरे पर गेदे न जेदा मकसद दौनें मुल्खें कन्नै रणनीतिक, आर्थिक ते तकनीकी सांझेदारी गी होर मजबूत करना ऐ। राष्ट्रपति मैक्रों हुंदे कन्नै सादे पर ओहू अज्ज 10 फरवरी थमां 12 फरवरी तगर फ्रांस दा दौरा करा रदे न। फ्रांस च मौजूद रौहने दौरान ओहू ए.आई एक्शन समिट दी सह अध्यक्षता करंगन, मुख् दक्खि चर्चाएं च शामिल होंगन ते मार्सेल च भारत दे नमें महावाणिज्य दूतावास दा उद्घाटन करडन। ए.आई शिखर सम्मेलन च दुनिया दे लीडरें ते वैश्विक टेक सी.ई.ओ नवाचार ते बड्डे जन भलाई लेई ए.आई तकनीक दे सहयोगी दृष्टिकोण पर विचारें गी सांझा करंगन।

<><><><><><>

RS/LS budget Session

राज्यसभा च अज्ज केंद्री बजट 2025-26 पर चर्चा कीती गेई चर्चा दी शुरूआत करदे होई कांग्रेस दे पी. चिदंबरम होरें आखेआ जे मौजूदा सरकार दौरान जीडीपी च देसा दे विनिर्माण खेत्तर दी भागीदारी घट्ट होई ऐ। आर्थिक सर्वेक्षण 2025 दा जिक्र करदे होई श्री चिदंबरम होरें आखेआ जे 2014 बरे च विनिर्माण खेत्तर दी भागीदारी 15 इशारिया 0-7 फीसद ही जेडी 2019 बरे च झिगड़ी आइयै 13 इशारिया 4-6 फीसद ते 2023 बरे च 12 इशारिया 9-3 फीसद रेई। उनें दोष लाया जे विनिर्माण खेत्तर च उत्पादन ते विनिर्माण खेत्तर च उत्पादन ते विनिर्माण च दिती गेई छूट दौनें गै खेत्तरें च सरकार नाकाम रेई ऐ। उनें इब्बी दोष लाया जे सरकार नै बेरोजगारी दे साफ आंकड़े नेई दित्ते ना। उंदा आखना हा जे युवाएं च 10 फीसद थमां मती बेरोजगारी ऐ जिल्लै के ग्रैजुएटें च एह तकरीबन 13 फीसद थमां मती ऐ।

<><><><><><>

LS-Speaker

लोकसभा दे स्पीकर ओम बिरला होरें अज्ज विघ्न पाने दी तय मंशा कन्नै सदस्यें दी शमूलियत च कमी ते बैठकें दी गिनतरी पार्लियामेंट ते राज्य विधानमंडल च घट्ट करने पर डूंगी चैंता बुज्झी ऐ। नमीं दिल्ली च महाराष्ट्र विधानसभा ते विधान परिषद नै नमें चनोए दे मिम्बरें लेई संसद दे कम्मैं-कारवाइयें बारै जानकारी देने सरबंधी कार्यक्रम च सभा गी संबोधित करदे होई आखेआ जे सदन दी कार्रवाई च योजनाबद तरीके कन्नै विघ्न पाना संसदीय लोकतंत्र नेई ऐ। उनें अगगे महाराष्ट्र विधानमंडलें दी खरी नतीजेकुन कम्मैं-कारवाइयें लेई बड़ेयाई कीती।

<><><><><><>

Railway-Minister

रेल मंत्री अश्विनी वैष्णव होरें अज्ज माघी पूर्णिमा स्नान थमां पैहले प्रयागराज रेलवे स्टेशन दे इंतजाम दा मुआयना कीता। दिल्ली च पत्रकारें कन्नै गल्लबात करदे होई वैष्णव होरें आखेआ जे सरकार नै महाकुम्भ लेई शैहरा दे 8 रेलवे स्टेशनें पर व्यापक इंतजाम कीते देन। उनें आखेआ जे केंद्र सरकार राज्य सरकार कन्नै रलियै कम्म करा'रदी ऐ तां जे श्रद्धालुएं लेई रेलवे स्टेशनें पर बेहतर तरीके कन्नै इंतजाम कीता जाई सकै। रेल मंत्रालय नै किश मीडिया रिपोर्ट पर सफाई दिंदे होई आखेआ जे प्रयागराज जंक्शन बंद नेई कीता गेआ ऐ। एहदे च आखेआ गेआ ऐ जे जिला प्रशासन दे मताबक प्रयागराज संगम स्टेशन इस म्हीने दी 14 तरीक तगर यात्रुएं दी आवाजाही लेई बंद रौह्ग। रेल मंत्रालय नै आखेआ ऐ जे महाकुम्भ मेला इलाके दे आले दोआले दे 8 स्टेशनें थमां नियमित ते खास रेल गड्डियां, सुचारू तौरा पर चलदियां न।

<><><><><><>

Mahakumbh Railway

उत्तरी रेलवे दे सी.आर.पी.ओ हिमांशु शेखर होरें आखेआ जे प्रयागराज च महाकुम्भ दे मद्देनजर श्रद्धालुएं दी सुविधा लेई अज्ज 20 थमां मती रेल गड्डियां चलाइयां गेइयां न। नमीं दिल्ली च मीडिया कन्नै गल्लबात करदे होई शेखर होरें आखेआ जे प्रयागराज दे सब्बे 8 स्टेशन यात्रुएं दी सुविधा लेई पूरी चाल्ली तैयार कीते गेदे न। उनें आखेआ जे औने आहलें दी आवाजाही दी निगरानी लेई सी.सी.टी.वी कैमरे इस्तेमाल कीते जा'रदे न ते रेलवे स्टेशनें पर इक कंट्रोल सेंटर बी बनाया गेदा ऐ। शेखर होरें इस गल्लै पर जोर भरेआ

जे कल महाकुम्भ भक्तेन दी सुविधा आस्तै प्रयागराज थमां औने-जाने आहली 300 थमां मती रेल गड्डियां चलाइयां गेइयां हियां। उनें लोकें गी आखेआ जे ओहू रेल गड्डी दे रह होने कन्नै जुड़ी दी अफवाहें उप्पर ध्यान नेई देन।

<><><><><><>

President Kumbh

राश्ट्रपति द्रौपदी मुर्मू होर अज्ज प्रयागराज च महाकुम्भ दा दौरा लाया। उनें गंगा जमना ते सरस्वती दे त्रिवेणी संगम च पवित्र चलोबी लाई। राश्ट्रपति हुंदे कन्नै इस मौके उप्पर उत्तर प्रदेश दियां राज्यपाल आनंदी बेन पटेल ते मुख्मन्त्री योगी आदित्यनाथ होरें बी उत्थे मौजूद हे।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेह्दी उमर 24 थमां 50 बरें दे बश्कार ऐ ते ओहू कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे

दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 फरवरी 2025 थवां पैहले-पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

MSME

सरकार नै अज्ज आखेआ जे प्रधानमंत्री इंटरनशिप योजना गी भलेआं लौहके, लौहके ते दरम्याने दर्जे दे उद्यमें लेई नेई बधाया गेआ ऐ। इस बारे च जानकारी एम.एस.एम.ई मंत्री जीतन राम मांझी होरें अज्ज राज्यसभा च लिखित परते च दित्ती। उनें आखेआ जे इस योजना दी पायलट प्रोजेक्ट दे तौरा पर पिछले बरे नवंबर म्हीने 1 लक्ख 25 ज्हार इंटरनशिप दे मौके उपलब्ध करोआए गे हे।

<><><><><><>

Prez. Unani Day

राश्ट्रपति द्रौपदी मुर्मू होर कल नमीं दिल्ली च यूनानी दिवस पर दऊं दिवसीय अंतरराष्ट्रीय सम्मेलन दा उद्घाटन करंगन। इस मौके पर विज्ञान ते प्रौद्योगिकी मंत्री डॉ. जतिंद्र सिंह बी मौजूद होंगन। 11 फरवरी गी हर बरे युनानी दिवस दे तौर पर माया जंदा ऐ जित्थे इस ध्याड़े यूनानी दे मशहूर चिकित्सक, शिक्षाविद ते स्वतंत्रता सेनानी हाकिम अजमल खान हुंदी बरे गंड हुंदी ऐ। आयुष मंत्रालय दे तैहत इक प्रीमियर रिसर्च काउंसल यूनानी मेडिसन च शोध आस्तै केंद्री काउंसल Integrative health solutions

A way forward आस्तै यूनानी मेडिसिन च नवाचार पर 2 दिनें दे अंतरराष्ट्रीय सम्मेलन दी मेजबानी करारदी ऐ। एह संवाद सहयोग ते ज्ञान गी इक दुए कन्नै सांझा करने दा इक मंच होग जेदा मकसद वैश्विक सेहत ते भलाई-बेहतरी गी बढ़ावा देने च यूनानी मेडिसिन दी अहम भूमिका गी उजागर करना होगा।

<><><><><><>

Abdullah-Shah Meet

जम्मू-कश्मीर दे मुखमंत्री उमर अब्दुल्ला होरें अज्ज नमीं दिल्ली च केंद्री गृह मंत्री ते सहकारिता मंत्री अमित शाह हुंदे कन्नै मलाटी कीती। इस दौरान दौनें धड़ें जम्मू-कश्मीर गी राज्य दा दर्जा देने, सुरक्षा स्थिति, बजट सत्र ते शासन सरबन्धी मुद्दें पर चर्चा कीती। जम्मू-कश्मीर दे मुखमंत्री दे तौरा पर औहदा साम्भने मगरा उमर अब्दुल्ला हुंदी गृह मंत्री हुंदे कन्नै एह त्रीस मलाटी ऐ।

<><><><><><>

Para Archery

पैरा तीरंदाजी च भारत दी सरिता नै बैंकाक च पैरा तीरंदाजी एशिया कप च वूमन्स काम्पाउंड ओपन श्रेणी च सुन्ने दा मेडल जित्तेआ ऐ। उनें सिंगानुर दी खडारन गी इक नेड़में मुकाबले च 143-142 कन्नै हराई दित्ता। इस चाल्ली आदिल मोहम्मद नै Men's W-1 श्रेणी च कैहू दा तगमा अपने नां कीता ऐ।

<><><><><><>

Aero-India Show

रक्षा मंत्री राजनाथ सिंह होरें अज्ज बेंगलुरू च एयरो इंडिया शो दा उद्घाटन कीता। इस मौके पर रक्षा राज्यमंत्री संजय सेठ ते कर्नाटक दे डिप्टी सी.एम डी.के शिव कुमार बी उत्थे मौजूद हे।

<><><><><><>

Weather

मौसम विभाग नै अगले द'ऊं दिनें दरान जम्मू ते कश्मीर च हल्की बरखा ते बर्फबारी होने दी पेशगोई कीती ऐ। अज्ज ते कल मौसम खास तौर पर घाटी च मता खसक्रिय होग। 12 थमां 14 फरवरी बश्कार मौसम खुश्क रौह्ग ते 15 ते 16 फरवरी गी मौसम बदलोखड़ा रौह्ग ते हल्की बरखा ते बर्फबारी दी बी मेद ऐ। जम्मू कश्मीर च इस बारी बरखा घट्ट होई ऐ। आंकड़े मूजब पैहली जनवरी थमां 29 जनवरी बश्कार बरखा च 87 फीसद कमी दर्ज कीती गई।

<><><><><><>